

**Naaja H. Nathanielsen
Attaviitsoq**

**UPA 2016/20
Naaja H. Nathanielsen**

**Siunnersuut uunga: Kommunit Namminersorlutillu Oqartussat missingersuutaat
naatsorsuutaallu pillugit Inatsisartut Inatsisaat nr. xx, xx.xx.xxx 2016-imersoq.**
(Aningaasaqarnermut Aatsitassanullu Naalakkersuisoq)

Tunngaviasigut inatsisissatut siunnersuut tapersersornarpoq. Pisortat missingersuutaannut aalajangersimasunik sinaakutsersuinissaq ajunngitsuvoq. Imaanngilarli inatsisissatut siunnersuut tamakkiisoq pitsaasuusoq.

Mianersuutigisorujussuussariaqarparput ukiukkaartumik amigartoortarnerit qanoq akuersaartartigissanerlutigit. Ilaanneeriarlunimi attartortariaqartassaaagut aningaasaliissaagaangatta. Aamma ajunngilaq naalakkersuinikkut aalajangiussaasussanit tunngaveqartunit isertikkumaagassanik naatsorsuutigisaqaraanni. Kisianni akisunaarsinnaavarput amigartoorutissat angissusaannik eqqorluinnartunik tunngaveqarnata siunissami isertitariumaagassanik isumalluuteqarluta akuersaartariaqartassagutta. Inatsisissatut siunnersuut tassuuna ersernerluppallaaqaq.

Naalakkersuisut siunnersuutigaat ukiut sisamat ingerlaneranni oqimaaqatigiissumik missingersuusiortarnissaq naammattoq. Taamaakkaluartoq takusinnaavarput naalakkersuisooqatigiit marluk kingulliit, ukiut sisamat ingerlaneranni oqimaaqatigiisitsiniarnerat iluatsinngitsoq. Tamanna patsiseqarpoq isertitassatut naatsorsuutigisimasat iseritaasimanninnerat imaluunniit ilimagisamiit ikinnerusimanagerat.

Ukiut kingulliit Inatsisartut Aningaasanut Inatsisissaannik suliaqarnermi erserpoq inatsisissatut siunnersuut saqqummiunneqarnerminiit akuerineqarnerminut allanngorujussuuartartoq. Tamassuma kingunerisarpaa aningaasanut inatsisissap inaariartornerani paatsiveerusimaakannerluni inissisimasarneq. Taamaattumik isumaqarpunga Naalakkersuisut Inatsisartut partiillu aningaasanik inatsimmik sivilunerusumik suliaqarnissaannik periarfissittariaqaraat. Tamannalu tunngavigalugu isumaqarpunga kingusippallaartoq Inatsisartut Aningaasanut Inatsisissaannik saqqummiusseqqaarnissamut killigitap septemberip aallaqqaataanut inissineqarnera. Siusinnerusariaqarpoq, soorlu aggustip aallaqqaataani imaluunniit aggustip 15-ani.

Aamma § 18 sukumiisumik oqaluuserisariaqarpoq. Tassani siunnersuutigineqarpoq Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfimmik pilersitsisoqassasoq. Aningaasaateqarfimmut immikkut ittumik isertitat ikineqartarnissaat pilersaarutaavoq, assersuutigalugulu attaveqaqatigiinnermut aningaasaliissutigineqartarnissaat siunnersuutigineqarluni. Tamanna ajunngikkaluarpoq. Taamaattorli ungasinnerusoq eqqarsaatigalugu aningaasaliissutit sordiaaneraniq nassuiaaneq ersarluppallaaqaaq soorlu aamma aningaasaliissutit imminut akilersinnaassusaannut piunasaqaataasut aamma ersarluppallaartut. Ersarinnerusumik oqaasinnguisariaqarpugut, taamaalilluni naalakkersuinikkut qularneq isumaqatigiinnginnerlu pinaveersaartinneqassammata aningaasat atorneqalerpata. Siunnersuutigineqartoq akiitsunut aningaasaliinernullu periutsimit maanna atuuttumit mikingitsumik isumalorsorneqarsimarpassippoq. Naalakkersuisut qinnuigissavakka ullu manna tikillugu suliniutinik itigartitsisoqarsimanersoq, akiitsunut aningaasaliinernullu periutsip piunasaqaatai tunngavigalugit.

Siunnersuutigineqartoq sukumiilluinnartumik Aningaasaqarnermut akileraartarnermullu ataatsimiititaliami suliarineqarnissaanut innersuuppara. Sulilluarisi.